



Aqqalu C. Jerimiassen  
Atassut

UKA 2021/14  
18. november 2021

## **Nunanut Allanut tunngasutigut naalackersuinikkut ingerlatsineq pillugu nassuiaat 2021.**

(Nunanut Allanut Nukissiuuteqarnermullu Naalackersuisoq)

Nualluussuup nunarsuatsinni tuniluuttup niuernikkut politikikkullu pingaarnersiuisariaqalernerit tamanut sunniuppoq. Nunatsinnilu oqiliallaatissaraarput suli annerusumik eqqugaasimannginnatta sulilu inuup inuuneranik akeqarsimanngimmat, naak niuernikkut annertuumik eqqugaasimagaluarluta. Taamaattorli tamatta pisussaaffigaarput inoqatitsinnut ataqqinnilluta mianersoqataanissamut. Neriuttalu nualluussuaq qaangiutiimiumaartoq tamatta peqqilluta, aningaasaqarnitsinnullu isasoortitsivissorsimanani.

Pingaartumillu namminersortortagut aningaasaqarnitsinnut kivitseqataanerpaat artukkerneqarujussuarnerat sapinngisamik tapersersuinikkut killilersuivallaarnaveersaarnikkut napaannarnissaannik qulakkeerinneqataasariaqarpugut. Kiisalu takornariaqarnikkut suliaqartut nittarsaassisullu aamma annertoourujussuarmik tapersersortariaqarpagut. Taakkuuppummi nunatsinnik nittarsaassisut.

Nunarput avataaniit qissimillattaarneqalenera neriuutinik pilersitsivoq, periarfissanillu nutaanik ammaassisussatut neriuuteqarfialutigu. Qanittuksummi pisiariniarneqaraluarluta allaat. Qujanartumilli Naalagaaffeqatigiinni suleqatigiilluartuni, uagutsinnullu asuli pinninniannigitsunik peqataagatta, uagut inuttut pisinnaatitaaffitsinnik, oqartussaaffitsinnillu ataqqinnittunik.

Avataaniit qissimillattaarneqalernerq periarfissarpassuarnik malitseqassappat pingaarutilerujussuuvoq peqqissaartumik avammut kiinnertarnissaq. Pinngortitatsinnut mianerinninnikkut, piniarnikkut aalisarnikkullu, inooriaatsitsinnut, imigassamik atuinikkut, meeranguit sumiginnagaasut atonerlugaasullu unitsinniarnersigut, imminut toquttartut amerlasoorujussuuneri, aatsitassanut tunngatillugu politikikkut sangujoraarmerujussuaq, inatsisiliornikkullu avataaniit isiginiarneqarnerput annertuumik nalilersuutaasussanngorsinnaapput. Periarfissanik nutaanik, nunanillu allanik suleqatiseqarnikkut, niuernikkullu nutaanik periarfissanik ujartuinermi sunniuteqarsinnaasut.

Pingaarutilerujussuuvorlu Naalackersuinikkut patajaatsumik, isumatusaartumik qunusaarinerpalaanngitsumik pissaanilissuuartullu pissuseqanngitsumik avammut kiinnertarnissaq. Suliassagut angorusutagut pissarsiassagullu annertoourujussuupput, taamaattorli alloriaatit isumatusaartut tulleriiarlugit anguniakkat anguniagassaraagut. Angusaqarniarneq suaaruteqarnerinnarniinngilaq, iliutsiniillunili.

Eqqaamassavarpullu nunat pissaanilissuit akornanni isumaqatiginninniarnertit isumatusaartumik ingerlanneqartassammata. Qulakkeerluarneqartassappullu nunatsinnut suut pissarsiassaanersut,



pingaarnertullu suna uagut pilliutigissaneripput paasilluassallugit.  
Namminiilivinniapallannerujussuarmi anguniaannarlugu sulluunniit avataaniit  
neqeroorutigineqartut aattaannarluta tikilluaqqupallattariaqanngilagut.

Danmarkimiimmi avissaarniapallannikkut nunanut allanut, immaqa peqqarniinnerujussuarnut  
pituttoriaasaarsinnaanissaq annertuumik mianersuutassaavoq. Qularnanngilarmi kikkulluunniit  
nunatsinnut saaffiginnittut annertuumik pissarsiaqarnissartik naatsorsuutigigaat.

Nassuiaammi nuannaarutigineqarpoq EU-miit ukiumut aningaasat pissarsiarisartakkagut  
eqqaallugit. Iluaqutaalluarpummi. Uteqqiinnassavarali, EF-miit aniniartut  
neriorsuuteqarnikuugaluarput niuerneq pitsanngorujussuassasoq, pisiassat akikillerujussuarlutik,  
killeqanngitsumillu aalisarsinnaalissasugut. Tamattalu nalunngilarput killormuinnaq  
pisoqarnikuusoq. Takutiinnarpaalu nunanut allanut tunngatillugu illumut isigivallaarluni  
aalajangiisimagaanni qanoq kinguneqarsinnaanersoq. Qujanartumilli kukkussutit  
ilinniarfigineqartarput, nassuerutigisinnaasimagaanni.

Atassummiit iluarisimaarparput nunani allani sinniisoqarfinnik pilersitsiniarnermut siunnerfik  
attaneqartoq. Minnerunngitsumik Beijingimi. Pingaartumillu niuernikkut iluaqutsissaasinnaasut  
attaviillu tamaasa periarfissatut iluatigaagut. Niuernikkummi suli annertoorujussuarmik kalaallit  
ilikkagassaqaqaagut. Nunarpassuimmi immaqa uagutsituut pinngortitaminni  
pigissaartiginnikkaluarlutik niuillaqqissutsimikkut ingerlalluarput. Tassa aqutissarput.  
Oqaannarnata kalaallit pigisagut nunat allat iluaqutigiinnarpaat, atornerlunneqarpugut.  
Mumisilaartigu, uagununa niuffarluppallaartugut. Uagunuku værsgoorlugit tunigigut. Aalisagaq,  
aatsitassaq allaluunniit qaqqineqarpat suliaq naammassineq ajorpoq, aatsaanuna aallartittussa.  
Taamaammallu namminersortortagut suli annertunerujussuarmik tapersersornerulertariaqarpagut  
killilersorunnaarlugit.

Pingaarsorivarpullu inuit pisinnaatitaaffii atuutsinnissaanut suli sukataaruteqassalluta. Suliassammi  
suli annertoqaat imaannaangitsut. Atassummiit upperivarput inuit annertunerusumik  
akisussaaffilerneqarunik nikeriarsinnaasugut, qulaaniillu pisortaniit naatsorsuuteqarneq  
utaqqiinnartutullu inissisimaneq qimakkiaartuaalersinnaagipput. Pisinnaatitaaffiimmi aamma  
pisussaaffiliipput. Akisussaaffeqarnerulernerlu kiffaanngissuseqarnerulerneramik malitseqartarluni.  
Inoqatinullu pinerluttuliornermut tunngatillugu pineqaatissiisarnermut massakkut  
sakkortusaaniarnermut suli aallartisaleruttormata neriuuteqalersitsipput.

Kalaallit sapinngitsorsuartut immitsinnut suaarutiguarput. Piffissanngorluinnarpoq  
oqaasiinnartut atorunnaarlugu iliuitsikkut uppersarnissaa.